



(„Sl. novine BPK Goražde“, broj: 3/23)

Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
O USLOVIMA I POSTUPKU ZA OSTVARIVANJE PRAVA NA JEDNOKRATNU
NOVČANU POMOĆ ZA TROŠKOVE DŽENAZE/SAHRANE U SLUČAJU SMRTI
RATNOG VOJNOG INVALIDA, ČLANA PORODICE ŠEHIDA/POGINULOG
BRANIOCA I DOBITNIKA RATNOG PRIZNANJA I ODLIKOVANJA

Goražde, decembar 2022.godine

Na osnovu člana 56. i 66. Zakona o organizaciji organa uprave u Federaciji BiH („Službene novine Federacije BiH“, broj: 35/05), člana 4. Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, broj: 70/05, 70/06, 9/10 i 90/17), člana 17. Zakona o pravima demobiliziranih branilaca i članova njihovih porodica („Službene novine Federacije BiH“, broj: 54/19 i 29/22) i člana 204. stav 3. Zakona o dopunskim pravima branilaca i članova njihovih porodica u Bosansko-podrinjskom kantonu Goražde („Službene novine Bosansko - podrinjskog kantona Goražde“, broj: 9/13, 11/14, 15/19 i 5/22), Ministar za boračka pitanja Bosansko - podrinjskog kantona Goražde, uz saglasnost Vlade Bosansko - podrinjskog kantona Goražde **d o n o s i:**

P R A V I L N I K

O USLOVIMA I POSTUPKU ZA OSTVARIVANJE PRAVA NA JEDNOKRATNU NOVČANU POMOĆ ZA TROŠKOVE DŽENAZE/SAHRANE U SLUČAJU SMRTI RATNOG VOJNOG INVALIDA, ČLANA PORODICE ŠEHIDA/POGINULOG BRANIOCA I DOBITNIKA RATNOG PRIZNANJA I ODLIKOVANJA

I OSNOVNE ODREDBE

Član 1. **(Osnovne odredbe)**

Ovim Pravilnikom utvrđuju se uslovi i postupak za ostvarivanje prava na jednokratnu novčanu pomoć u slučaju smrti ratnog vojnog invalida, člana porodica šehida/poginulog branioca i dobitnika ratnih priznanja i odlikovanja (u daljem tekstu: lica iz člana 1.), koji su, u momentu smrti, imali prebivalište na prostoru Bosansko-podrinjskog kantona Goražde i okolnim općinama u entitetu Republika Srpska (u daljem tekstu: jednokratna novčana pomoć za troškove dženaze/sahrane).

Član 2. **(Objavljivanje javnog poziva)**

Ministarstvo za boračka pitanja Bosansko – podrinjskog kantona Goražde (u daljem tekstu: Ministarstvo), po usvajanju Budžeta Bosansko - podrinjskog kantona Goražde (u daljem tekstu: Kanton) i programa o utrošku sredstava, za svaku budžetsku godinu objavljuje javni poziv za ostvarivanje prava na jednokratnu novčanu pomoć za troškove dženaze/sahrane shodno odredbama ovog Pravilnika.

Član 3. **(Korisnici prava)**

- (1) Pravo na jednokratnu novčanu pomoć za troškove dženaze/sahrane u slučaju smrti lica iz člana 1. ovog Pravilnika, imaju članovi uže porodice koji su snosili troškove dženaze/sahrane umrlog lica.
- (2) Pod članovima uže porodice, u smislu prethodnog stava ovog člana, smatraju se: bračni partner, roditelji, djeca rođena u braku ili van braka, usvojenik i pastorak.
- (3) Pravo na jednokratnu novčanu pomoć za troškove dženaze/sahrane može ostvariti i drugo lice koje je snosilo troškove dženaze/sahrane pod uslovom da umrli nema živih članova uže porodice.
- (4) Pravo na jednokratnu novčanu pomoć za troškove dženaze/sahrane može se priznati samo jednom članu uže porodice, odnosno licu iz stava (3) ovog člana.
- (5) Ako su članovi uže porodice ili lice koje je snosilo troškove dženaze/sahrane ostvarili pravo na participaciju troškova dženaze/sahrane putem Fonda penzijsko - invalidskog osiguranja, radnog odnosa ili po drugom osnovu u nižem iznosu od visine sredstava definisane odredbama ovog Pravilnika, imaju pravo na odobravanje naknade na ime razlike između isplaćenih sredstava po drugom osnovu.

- (6) Izuzetno, pod uslovima utvrđenim ovim Pravilnikom, pravo iz prethodnog stava mnogu ostvariti i članovi uže porodice umrlog demobiliziranog branioca, ili lice koje je snosilo troškove dženaze/sahrane u slučaju da umrli nije imao članova uže porodice.
- (7) Pravo na jednokratnu novčanu pomoć za troškove dženaze/sahrane ne mogu ostvariti članovi porodice lica iz člana 1. ovog Pravilnika kod kojih postoje okolnosti iz člana 36. Zakona o pravima branilaca i članova njihovih porodica („Službene novine Federacije BiH“, broj: 33/04, 56/05, 70/07, 9/10 i 90/17).
- (8) Dinamika rješavanja po zahtjevima za priznavanje prava na jednokratnu novčanu pomoć za troškove dženaze/sahrane biti će usklađena sa operativnim izvršenjem budžetskih sredstava odobrenih za ovu namjenu u tekućoj godini.

II POSTUPAK PRIZNAVANJA PRAVA

Član 4. (Način podnošenja zahtjeva)

- (1) Odobravanje jednokratne novčane pomoći za troškove dženaze/sahrane po odredbama ovog Pravilnika vrši se na osnovu pisanog zahtjeva i dokumentacije kojom se dokazuje ispunjavanje uslova utvrđenih ovim Pravilnikom.
- (2) Zahtjev za ostvarivanje prava na jednokratnu novčanu pomoć za troškove dženaze/sahrane podnosi se najkasnije u roku jedne godine u odnosu na datum smrti lica iz člana 1. ovog Pravilnika.
- (3) Podneseni zahtjev za ostvarivanje prava iz prethodnog stava ovog člana važi za budžetsku godinu u kojoj je podnjet.
- (4) Zahtjev za ostvarivanje prava iz stava (1) ovog člana podnosi se organu nadležnom za boračko - invalidsku zaštitu prema mjestu posljednjeg prebivališta lica iz člana 1. ovog Pravilnika.
- (5) Lica koja žive na području entiteta Republika Srpska, zahtjev za ostvarivanje prava podnose najbližem organu nadležnom za boračko - invalidsku zaštitu prema mjestu posljednjeg prebivališta na teritoriji Federacije BiH.

Član 5. (Obavezna dokumentacija)

- (1) Uz zahtjev za ostvarivanje prava na pomoć u slučaju smrti lica iz člana 1., podnosilac zahtjeva je dužan priložiti originale ili ovjerene kopije dokumenata, kojima se dokazuje ispunjavanje uslova za ostvarivanje prava, kako slijedi:
 - a) Smrtni list lica za koje se traži jednokratna novčana pomoć za troškove dženaze/sahrane;
 - b) Dokaz o posljednjem prebivalištu lica za kojeg se traži pomoć za troškove dženaze/sahrane (CIPS);
 - c) Za umrlo lice - Rješenje nadležnog organa o priznatom statusu člana porodice šehida-poginulog borca, vojnog invalida, dodjeli ratnog priznanja ili Uvjerenje da je to lice bilo pripadnik Oružanih snaga **najmanje jednu godinu**, izdato na obrascu FMB 3A od nadležne Grupe/Samostalnog izvršioca za pitanja evidencija iz oblasti vojne obveze;
 - d) Dokaz da je podnosilac zahtjeva bio član uže porodice umrlog lica (rodni ili vjenčani list);
 - e) Dokaz o plaćenim troškovima dženaze/sahrane od strane podnosioca zahtjeva;
 - f) Za drugo lice koje je snosilo troškove dženaze/sahrane: Ovjerena izjava podnosioca zahtjeva, kojom pod punom moralnom, materijalnom i krivičnom odgovornošću izjavljuje da umrlo lice nema živih članova uže porodice;
 - g) Za ZAPOSLENE podnosiocje zahtjeva: potvrda poslodavca da nije ostvario pravo na troškove dženaze/sahrane po istom osnovu;

- h) Za NEZAPOSLENE podnosioce zahtjeva: dokaz da su na evidenciji nezaposlenih osoba nadležne službe za zapošljavanje ili, ukoliko se ne vodi na evidenciji službe za zapošljavanje, uvjerenje ispostave porezne uprave kao dokaz o statusu nezaposlenosti ili ček od penzije;
- i) U slučaju da je umrlo lice bilo korisnik penzije, dokaz izdat od nadležnog organa da podnosilac zahtjeva koji je izmirio troškove dženaze/sahrane, u tekućoj godini nije ostvario naknadu u skladu sa Zakonom o penzijskom i invalidskom osiguranju Federacije BiH („Službene novine FBiH“, broj: 13/18);
- j) Kopiju kartice tekućeg računa banke ili ovjerenu potvrdu banke, sa brojem tekućeg računa podnosioca zahtjeva.

(2) Organ nadležan za boračko – invalidsku zaštitu zadržava pravo traženja i dodatne dokumentacije koja nije obuhvaćena stavom (1) ovog člana, ukoliko su dostavljeni dokazi u kontradiktornosti, te je neophodno utvrditi stvarno stanje stvari.

Član 6. **(Postupak donošenja rješenja)**

(1) Ukoliko je podnešeni zahtjev potpun i ispunjava uslove za dodjelu jednokratne novčane pomoći u skladu sa odredbama ovog Pravilnika, rukovodilac gradske/općinske službe nadležne za boračko - invalidsku zaštitu donosi rješenje o priznavanju prava na jednokratnu novčanu pomoć za troškove dženaze/sahrane lica iz člana 1.

(2) U postupku donošenja rješenja, ovlašteni službenik je dužan izvršiti uvid i provjeru u sistemu neoporezivih nadoknada, kako bi se isključila mogućnost da je podnosilac zahtjeva već ostvario pravo na jednokratnu novčanu pomoć za troškove dženaze/sahrane za isto lice kod drugih organa.

(3) Zahtjevi koji su nepotpuni ili ne ispunjavaju uslove iz ovog Pravilnika odbacuju se ili odbijaju posebnim upravnim aktom, u skladu sa odredbama Zakona o upravnom postupku („Službene novine Federacije BiH“, broj: 2/98, 48/99 i 61/22) (u daljem tekstu: ZUP).

(4) Protiv upravnih akata iz stava (1) i (3) ovog člana koje donosi prvostepeni organ nadležan za boračko - invalidsku zaštitu, može se izjaviti žalba Ministarstvu u skladu sa odredbama ZUP-a.

(5) Rješenje o priznavanju prava iz stava (1) ovog člana se donosi u 3 (tri) primjerka, pri čemu se jedan primjerak dostavlja stranci.

Član 7. **(Visina sredstava koja se može odobriti na ime jednokratne novčane pomoći za troškove dženaze/sahrane)**

Jednokratna novčana pomoć za troškove dženaze/sahrane utvrđuje se u visini jedne prosječne neto plate isplaćene zaposlenim u Federaciji BiH u prethodnoj godini, prema posljednjim objavljenim podacima Federalnog zavoda za statistiku.

Član 8. **(Priznavanje prava na jednokratnu novčanu pomoć za troškove dženaze/sahrane u slučaju smrti demobiliziranog branioca)**

(1) Pravo na jednokratnu novčanu pomoć za troškove dženaze/sahrane u slučaju smrti demobiliziranog branioca članovi uže porodice sa kojima je umrli živio do momenta smrti ili lice koje je snosilo troškove dženaze/sahrane ostvaruju podnošenjem pisanog zahtjeva Federalnom ministarstvu za pitanje boraca i invalida odbrambeno - oslobodilačkog rata (u daljem tekstu: Federalno ministarstvo) u skladu sa Zakonom o pravima demobiliziranih branilaca i članova njihovih porodica („Službene novine Federacije BiH“ broj: 54/19 i 29/22).

- (2) Postupak priznavanja prava u slučaju smrti demobiliziranog branioca pokrenutog od strane lica iz prethodnog stava ovog člana provodi se u skladu sa federalnim propisima kojima je regulisana predmetna oblast.
- (3) Lica iz stava (1) ovog člana koja ostvare pravo na jednokratnu novčanu pomoć za troškove dženaze/sahrane u slučaju smrti demobiliziranog branioca u manjem iznosu u odnosu na iznos iz člana 7. ovog Pravilnika, a na osnovu federalnih propisa, mogu se obratiti zahtjevom službi nadležnoj za boračko – invalidsku zaštitu, prema mjestu prebivališta umrlog demobiliziranog branioca, radi ostvarivanja prava na subvencioniranje troškova u visini razlike isplaćenih sredstava i visine sredstava utvrđenih članom 7. ovog Pravilnika.

III FINANSIRANJE PRAVA

Član 9. (Obezbjeđenje sredstava)

- (1) Finansiranje prava utvrđenog ovim Pravilnikom za svaku godinu obezbjeđuju se do visine sredstava odobrenih Budžetom Ministarstva.
- (2) U slučaju kada odobrena budžetska sredstva iz prethodnog stava ovog člana nisu dostatna za rješavanje svih prispjelih zahtjeva za odobravanje jednokratne novčane pomoći za troškove dženaze/sahrane lica iz člana 1. za tu budžetsku godinu, iznos jednokratne novčane pomoći može biti i niži od iznosa utvrđenog članom 7. ovog Pravilnika, uz procentualno smanjenje iznosa novčane pomoći do 50% za utvrđeno pravo u članu 3. stav (5), a o čemu odluku donosi Ministar.

IV PRELAZNE I ZAVRŠNE ODREDBE

Član 10. (Primjena općih propisa)

Za sve što nije regulisano ovim Pravilnikom primjenjuju odredbe ZUP-a i općih propisa.

Član 11. (Rodna neutralnost)

Sve imenice koje se odnose na branioce i članove njihovih porodica, upotrijebljene u ovom Pravilniku samo u muškom ili samo u ženskom rodu, odnose se na oba spola.

Član 12. (Stavljanje van snage Pravilnika)

Danom stupanja na snagu ovog Pravilnika prestaje da važi Pravilnik o uslovima, načinu i kriterijima za dodjelu jednokratnih novčanih pomoći za slučaj smrti ratnog vojnog invalida i člana porodice šehida/poginulog branioca i dobitnika ratnih priznanja i odlikovanja („Službene novine Bosansko – podrinjskog kantona Goražde“, broj: 3/20, 9/21 i 1/22).

Član 13. (Način izmjena i dopuna Pravilnika)

Izmjene i dopune ovog Pravilnika se vrši na način i po postupku koji važi za njegovo donošenje.

Član 14. (Tumačenje odredbi)

Tumačenje odredbi ovog Pravilnika daje Ministar.

Član 15.
(Stupanje na snagu)

Ovaj Pravilnik stupa na snagu danom dobijanja saglasnosti od Vlade Bosansko - podrinjskog kantona Goražde, a naknadno će se objaviti u „Službenim novinama Bosansko – podrinjskog kantona Goražde“.

MINISTAR

Avdo Mirvić

Broj:
Goražde, ____ . ____ . 2022. godine

Na ovaj Pravilnik Vlada Bosansko - podrinjskog kantona Goražde dala je saglasnost svojom Odlukom broj: _____/22 od ____ . ____ . 2022. godine.